

■ OR DA LA VITA DA LUDMILLA CAHENZLI 15

Far si iert en temps da crisa

«Nus pudessan bain puspè ina giada far si iert», di la gronda durant gentar.

«Mhm», di jau e sper che quest raschienen varghia uschè svelto sco ina pluschignada da stad.

«Gea», di la pitschna tut intgantada. «Nus plantain tomatas e frajas.»

«Tomatas n'èn anc mai creschidas tar nus», remartga Eugen Cahenzli.

«Ma tartuffels e salata», di la gronda. «Navair bab? Nus faschain puspè si iert?»

«Na», fa Eugen en tun sitg. «Tar nus na guarda tuttina nagin da l'iert. U ch'i pirescha tut u ch'ìls schnecs maglian si tut.»

«Ma uss avainsa ina crisa economica», di la gronda. «Sche ti e la mamma perdais vossas plazzas, vainsa almain salata en l'iert.»

Eugen sa scufla. «Ti has la bella idea ...»

Jau, Ludmilla Cahenzli, sai che mes um vul uss entschaiver a referir, tge che sia plazza muntia per la famiglia en cumparegliaziun cun la miserabla raccolta d'in schamper iert. Ma jau dun ina bintgunada bain dosada en la stgaina da mes charissim. «Igl è bain bel, sche noss uffants fan quitads per nus e sch'els vulan gidar», di jau e sper che Eugen remartgia mia eglia da conspirativa che duess exprimer ch'i sa tracta qua d'ina dumonda d'educaziun.

«Bel?!», Eugen sfruscha sia stgaina che dola e na remartga nagut. «Dapi cura chattas ti ch'i saja bel da far si iert? E tgi bogna e zercla l'iert?»

«Noss uffants èn gronds avunda per bagnar mintga saira la salata e quest zichel zerclim n'è bain nagin problem.»

Eugen vul gia dar encunter ch'jau al guard cun mia eglia da veto che munta: questa discussiun na faschain nus betg davant ils uffants.

«Ma jau na chav betg enturn l'iert», di Eugen e ma guarda cun in'egliada ultimativa che munta: questa giada na fatsch jau betg l'asen. Quai pos emblidar.

Dus dis pli tard sa vestgescha la gronda uschia sco quai ch'ella manegia ch'ins sa vestgeschia, sch'ins lavura en iert. Ella fa sa chapescha era stim ch'ella vesia or anc cool avunda, en cas ch'in ami dal frar avess casualmain da vegnir sin visita e da vesair ella a stgavargnond en il terratsch.

«Jau vom uss a chavar enturn l'iert», di ella e sajetta sper mai ora.

Jau ponderesch, sch'jau duess far attenta ella ch'i saja dumengia da Pasca e ch'ins na fetschia en famiglias cristifidaivlas betg talas lavurs la dumengia. Ma damai ch'jau hai la devisa ch'ins na duess mai tegnaire si ils uffants, sch'els han la buna veglia da lavurar, e cunzunt damai ch'jau na vi betg ristgar ch'jau stoppia forse mezza chavar enturn l'iert, prend jau be ils eglers da sulegl, ma met en la sutga lunga e guard co che mia figlia traf-fitga cun badigl e zerclin.



ILLUSTRATURA YVONNE GIENAL/WWW.YVONNE-GIENAL.CH

Noss iert è circumdà d'ina saiv da glimajas. Quella aveva Eugen chavà en il terren avant circa diesch onns. Nus n'avain betg cumenzà a far si iert, perquai che nus fissan ortulans passionads ed era betg, perquai che nus stuessan ex-num avoir legums frestgs. Anzi. «Noss uffants ston vesair co che las pitschnas plantinas pruin e creschan or dal terratsch.» Uschia tunava nossa maxima d'educaziun.

L'emprim onn ha la saiv da glimajas fatg buns servetschs. Gnanca ina suletta glimaja è sa laschada vesair en noss iert e la salata è creschida tiptop. Fin las vacanzas da stad. Cura che nus essan turnads da las vacanzas, era l'entir iert piri e nus avain pudì spendrar mo anc ils tschagugliuns. Il segund onn èn duas glimajas raividas sur in fain or en noss iert. Ina tala prestaziun sportiva avain nus onurà cun laschar en vita las duas cumpognas. Suenter las vacanzas – questa giada aveva jau surdà ad ina vischina da bagnar l'iert, ma i aveva pluvì mintga di ed ella n'era perquai mai stada a guardar da l'iert –

avevan las glimajas maglià si rubas e strubas tut.

Cun ils onns han noss uffants pudì observar anc ulteriuras modas co che plantinas da salata e da legums pon ir en malura: cun stenschentiar en zerclim u entras terratsch stagnira. Perquai avain jau ed Eugen decidì ch'i saja pli prudent, sche noss uffants observian en l'avegnir tar ils vischins co che las plantinas creschan.

«Guarda, mamma», cloma la gronda che ha dentant sdrappà ora tut il zerclim. «Qua plantainsa las ervas e qua ils tartuffels. Sas anc quel onn ch'jau aveva chavà ora quest bellezza tartuffel. E ti n'ess gnanca stada pronta da cuschinar el!»

Jau dun il chau e ma regord anc bain co che la figlia aveva chatschà la primavera in tartuffel en il terratsch e ditg: «Or da mintga tartuffel creschan almain quindesch tartuffels novs. Quai ha la scolasta ditg.»

L'atun aveva la figlia lura chavà or il medem tartuffel e ditg ch'el saja creschì a moda stravaganta. Ella aveva vulì ch'jau fetschia maluns per l'entira famiglia cun ses tartuffel.

«Co fissi, sche nus empruvain ina giada da plantar riablas empè da tartuffels?», dumond jau a moda diplomatica.

«Pertge betg?», di la gronda. «Tartuffels nutrissan zuar meglier en temps da crisa, ma riablas èn er okay.»

Ier sun jau stada a cumprar ervas e plantinas: peterschigl, rosmarin, timian, salata, urtais, por, zuchettis, zitgas e sems da riablas. Lura hai jau anc vesì ina sprizza, in zerclin, in bel badigl, divers auters urdains nizzaivels, guants da lavur e stivals da gomma tut giagls ch'èn da preschent gist en moda. Cura ch'jau hai bandunà la stizun da l'ortulan, hai jau gì il sentiment d'avair fatg ina bun'ovra. Sche nossas plantinas avessan puspè dad ir en malura e nus na racoltassan schuber lidi muz nagut, ha almain l'ortulan fatg ina buna fatschenta e mitscha da la crisa economica.

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria